



10. marts 2026

UPA 2026/64

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Meeqqat atuarfiani klassimi ataatsimi annerpaamik 18-inik atuartoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jørgen Rosbach, Demokraatit)

Tungavilersuut

Ilinniartitaanitsinnut tamarmut, meeqqallu atuagarsornikkut, inooqataanikkut, inuttullu ineriartornerinut meeqqat atuarfiat tungaviuvoq. Tassani meeqqat ilinniaqqinnissaminnut, inuiaqatigiinnilu eqeersimaartumik peqataanissaminnut ilusilerneqartarput, tapersersorneqartarput, piareersarneqartarlutillu. Meeqqat atuarfiani sinaakkutit naammanngikkaangata, atuarnerinnaanngitsumut kinguneqartarpoq. Atuartunut ataasiakkaanut, inuiaqatigiinnullu kinguneqartarpoq.

Demokraatit isumaqarput, meeqqat atuarfiani atuartunut, ilinniartitsisunullu pitsaanerusunik sinaakkutissiinissamut politikkip tungaatigut ersarissumik suliniuteqarnissamut piffissanngortoq. Klassini atuartut amerlassusaat uagutsinni qitiuvoq. Klassimi ataatsimi atuartut amerlavallaartillugit ilinniartitsisut atuartitsinermik naleqqussaannissaminnut, atuartullu ataasiakkaat atuagarsornikkut imaluunniit inooqataanikkut unammillernartitai piffissaagallartillugu paasinissaannut, atuartunullu ataasiakkaanut atassuteqaatinik pilersitsinissaminnut periarfissaat killeqalersarput. Nukarlerni atuartunut, atuartunullu immikkut pisariaqatitsisunut pingaartumik eqquivoq.

Taamaalilluni klassini atuartut amerlavallaartillugit, atuartut ataasiakkaat takunissaannut aamma pitsaanerpaamik tapersersornissaannut ilinniartitsisut periarfissaannut killiliivoq. Atuartitsinerup assigiinngisitaarnissaanut, siusissumik suliniuteqarnissamut, eqaatsumillu perorsaanissamut periarfissat annikillisittarpai. Pingaartumik atuartunut immikkut ikiugassaasunut eqquisarpoq, assinganillu ilinniartitsisunut naleqqutinngitsumik ulapititsisarluni. Taassumammi eqqissiviilliorneq, atugarliornerlu kingunerisinnaavai.

Tamanna pillugu klassimi atuartut agguaqatigiissillugu amerlassusaasa annikillisinneqarnissaat atuartitaanerup qaffasissusaanut tungassuteqaannanngilaq, aammali meeqqat atuarfiani atugarissaarnerulersitsinissamik suliaqarnermi qitiulluinnartumik sakkussaalluni.

Inatsit atuuttoq naapertorlugu ullumikkut klassimi ataatsimi atuartut 26-usinnaapput. Naalakkersuisut namminneerlutik naatsorsuinerisa takutippaat, klassit 18-it sinnerlugit atuartullit amerlanerpaartaat



illoqarfinni anginerusuniittut. Pingaartumik Nuummi, tassani klassit 18-inik imaluunniit amerlanerusunik atuartullit 57 procentii Nuummiimmata¹. Ilutigisaanik Naalakkersuisut erseqqissaatigaat, klassimi atuartut agguaqatigiissillugu amerlassusaat atuartunut 18-inut ikilisinneqaruni tamanna perorsaanikkut iluaqutitaqassasoq, pingaartumik klassini nukarlerni atuartunut aamma atuartunut immikkut pisariaqartitsisunut.

Klassini atuartut ikinneruppata tamanna atuartitaanermik kisimi qaffaassasoq, nunat tamalaat akornanni misissuinerit erseqqissumik uppersaanngitsut Demokraatit isumaqataapput. Kisianni maluginiarparput ilisimatusarnerit aamma Naalakkersuisut namminneerlutik naliliinerisa erseqqissaatigigaat, klassini atuartut ikinneruppata tamanna ilinniartitsisut aamma atuartut akornanni atassuteqaatinut annertusaataasinnaasoq, atuartitsinerimi eqqissisimanerunermik pilersitsisinnaasoq, ataasiakkaanillu tapersersuinissamut periarfissagissaarnerutitsissasoq.

Tamanna tunuliaqutaralugu Demokraatit isumaqarput, inatsisitigut aalajangersagaalluni atuartut amerlanerpaamik 18-iugunik nuna akimorlugu atuartunut assigiinnerusumik atugaqartitsinissaq qulakkeerneqassasoq, ilutigisaanillu meeqqat atuarfiat aamma meeqqat atugarissaarnissaat politikikkut annertuumik pingaartinneqartoq ersarissumik oqariartuutigineqarluni.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

§ 37 naapertorlugu apeqqummut nr. 032/2025-mut Naalakkersuisut akissuteqarnerminni naatsorsorpaat, klassimi atuartut agguaqatigiissillugu amerlassusaat nuna tamakkerlugu 18-inut ikilisinneqarpat saniatigut klassit 53-it, ilinniartitsisullu ukiumut sulinerat 68,6-it pisariaqartinneqassasut. 2024-mi ilinniartitsisut akissarsiaannut aningaasartuutiviit, matumani aamma tapiissutit aamma isumaqatigiissutitigut pissutsit aallaavigalugit, ataatsimut isigalugu kommunini ukiumut aningaasartuutaanerusussat 33,7 mio. koruunit missaannut naatsorsorneqarput².

Taassuma saniatigut Atuarfik pillugu Inatsisartut inatsisaata allanngortinneqarneranut, atuarfiup aaqqissuussaanerata naleqqussarneqarneranut, sulilersitsinerunernut, atuarfimmilu atugassarititanik alliliisoqassappat alliliinernut imaluunnit nutarterinernut atatillugu siunnersuut allaffissornikkut aningaasartuuteqarnermik kinguneqassaaq. Najukkami pissutsit apeqqutaallutik aningaasartuutissat allanngorarsinnaasut, atuartitsivissanillu nutaanik pisariaqartitsisoqassappat qaffassinnaasut maluginiarneqarpoq.

Namminersortunut aningaasatigut allaffissornikkullu kingunerisassai

Siunnersuut namminersortunut aningaasatigut, allaffissornikkullu toqqaannartumik kinguneqassanngitsoq nalilerneqarpoq.

¹ § 37 naapertorlugu apeqqummut normu 032/2025-mut akissut

² § 37 naapertorlugu apeqqummut normu 032/2025-mut akissut



Innuttaasunut aningaasatigut allaffissornikkullu kingunerisassai

Meeqqat meeqqat atuarfiani ilikkagaqarnissaannut, atugarissaarnissaannullu sinaakkutit pitsaanerulernerisigut, siunnersuut innuttaasunut kinguneqarsinnaavoq. Siunnersuutip kingunerisaanik innuttaasunut allaffissornikkut imaluunniit aningaasatigut toqqaannartumik kinguneqassasoq naatsorsuutigineqanngilaq.